



ЎЗБЕКИСТОН RESPUBLIKASI PREZIDENTINING QARORI

2024 yil « 24 » май

№ ПҚ–193

Тадбиркорлик субъектларига субсидиялар, имтиёзлар ва преференцияларни тақдим этиш тартибларини такомиллаштириш бўйича қўшимча чора-тадбирлар тўғрисида

Ўзбекистон Республикаси Президентининг 2024 йил 23 январдаги “Тадбиркорлик субъектларининг барқарорлик рейтингини жорий этиш чора-тадбирлари тўғрисида”ги ПҚ–39-сон қарорига мувофиқ, шунингдек, тадбиркорлик субъектларини давлат томонидан қўллаб-қувватлаш ҳамда уларга субсидиялар, имтиёзлар ва преференцияларни тақдим этиш тартибларини янада такомиллаштириш мақсадида:

1. Ўзбекистон Республикаси Президентининг 2024 йил 23 январдаги “Тадбиркорлик субъектларининг барқарорлик рейтингини жорий этиш чора-тадбирлари тўғрисида”ги ПҚ–39-сон қарорига мувофиқ:

қонунчилик талабларига риоя этган ҳолда фаолият юритаётган тадбиркорлик субъектларини аниқлаш ва қўшимча рағбатлантиришни назарда тутувчи **Тадбиркорлик субъектларининг барқарорлик рейтингини** (кейинги ўринларда – рейтинг) жорий этилганлиги;

тадбиркорлик субъектларига субсидиялар, имтиёзлар ва преференциялар уларнинг рейтинг даражасидан келиб чиққан ҳолда жорий этилиши белгиланганлиги маълумот учун қабул қилинсин.

2. Шундай тартиб ўрнатилсинки, унга мувофиқ юридик шахс ташкил этган ҳолда фаолият юритаётган тадбиркорлик субъектларига субсидиялар, солиқ ва божхона имтиёзлари ҳамда преференциялар (кейинги ўринларда – қўллаб-қувватлаш чоралари) уларнинг рейтинг даражасидан келиб чиққан ҳолда **қўйидаги тартибда** жорий этилади:

а) қўллаб-қувватлаш чоралари **“В”** ва **ундан юқори** рейтинг даражасига эга **тадбиркорлик субъектларига** амалдагисига нисбатан қуйидаги миқдорларда тақдим этилади:

“AAA” тоифа – амалдаги миқдорнинг **100** фоизи;

“AA” тоифа – амалдаги миқдорнинг **90** фоизи;

“A” тоифа – амалдаги миқдорнинг **80** фоизи;

“BBB” тоифа – амалдаги миқдорнинг **70** фоизи;

“BB” тоифа – амалдаги миқдорнинг **60** фоизи;

“B” тоифа – амалдаги миқдорнинг **50** фоизи;

б) қўллаб-қувватлаш чоралари рўйхатдан ўтганига **олти ой бўлмаган**, шунингдек, Ўзбекистон Республикаси Президентининг 2022 йил 30 декабрдаги ПФ–287-сон Фармонига мувофиқ **4 ва 5-тоифадаги** туманларда фаолият юритаётган тадбиркорлик субъектларига уларнинг рейтинг даражасидан қатъи назар амалдаги миқдорларда тақдим этилади;

в) тадбиркорлик субъектларининг рейтинг даражаси:

пасайган тақдирда, қўллаб-қувватлаш чораларини тақдим этиш **уч ой давомида** сақлаб қолинади;

юқорилаган тақдирда, қўллаб-қувватлаш чоралари кейинги ойдан бошлаб янгиланган рейтинг даражасига мувофиқ миқдорларда тақдим этилади.

Белгилансинки, мазкур бандда белгиланган мезонлар ушбу қарор қабул қилингунга қадар жорий этилган қўллаб-қувватлаш чораларига нисбатан татбиқ этилмайди.

3. Тадбиркорлик субъектларига тақдим этиладиган субсидиялар, имтиёзлар ва преференцияларни мақбуллаштириш ҳамда уларнинг самарадорлигини таъминлаш бўйича республика комиссияси (кейинги ўринларда – Республика комиссияси) **1-иловага мувофиқ** таркибда тузилсин.

4. Республика комиссияси (Ж. Қўчқоров) **2024 йил 1 октябрга қадар** қуйидагиларни назарда тутувчи таклифларни Ўзбекистон Республикаси Президенти Администрациясига киритсин:

амалдаги барча қўллаб-қувватлаш чораларини хатловдан ўтказган ҳолда, уларнинг иқтисодиётга ва соғлом рақобат муҳитига таъсирини **таҳлил қилиш** ҳамда **самарадорлигини баҳолаш** натижалари бўйича тубдан қайта кўриб чиқиш;

туман ва шаҳар тоифасидан келиб чиқиб, тадбиркорлик субъектларига қўллаб-қувватлаш чораларини қўллаш тартиби натижадорлигини баҳолаш;

қўллаб-қувватлаш чораларини тақдим этишда тадбиркорлик субъектлари томонидан эришилиши лозим бўлган **аниқ мақсадли кўрсаткичларни белгилаш** тартибини жорий этиш;

давлат томонидан қўллаб-қувватлаш чоралари тақдим этиладиган **соҳалар, тармоқлар ва фаолият йўналишлари доирасини** аниқ белгилаш;

қонунчилик ҳужжатларига имтиёзлар ва преференциялар тушунчаси, турлари ва шаклларини **тўлиқ ифодаладиган нормаларни** киритиш;

қўллаб-қувватлаш чораларидан фойдаланиш самарадорлигини **мониторинг қилиш ва баҳолаш**, мақсадсиз фойдаланилган маблағларни **мажбурий тартибда қайтариш тартибини** жорий этиш;

қўллаб-қувватлаш чораларидан фойдаланиш натижадорлиги тўғрисидаги маълумотларни **очиқ эълон қилиб бориш**;

таҳлиллар ва баҳолаш натижалари бўйича **самарасиз деб топилган қўллаб-қувватлаш чораларини бекор қилиш**.

5. Белгилансинки:

Рақобатни ривожлантириш ва истеъмолчилар ҳуқуқларини ҳимоя қилиш қўмитаси **ҳар йили 1 июлга қадар** қўллаб-қувватлаш чораларининг соғлом рақобат муҳитига таъсирини баҳолайди ҳамда баҳолаш натижаларини Иқтисодиёт ва молия вазирлигига киритади;

2-иловага мувофиқ рўйхатда келтирилган вазирлик ва идоралар (кейинги ўринларда – манфаатдор вазирлик ва идоралар) **ҳар йили 1 июлга қадар** тадбиркорлик субъектларига тақдим этилган қўллаб-қувватлаш чоралари ҳамда уларнинг самарадорлиги тўғрисидаги ҳисоботларни Иқтисодиёт ва молия вазирлигига тақдим этади;

Иқтисодиёт ва молия вазирлиги Ҳисоб палатаси билан биргаликда **ҳар йили 1 августга қадар** қўллаб-қувватлаш чораларининг самарадорлигини баҳолаш яқунлари бўйича Республика комиссиясига ахборот киритиб боради;

Республика комиссияси **ҳар йили 1 октябрга қадар** қўллаб-қувватлаш чораларининг самарадорлигини баҳолаш яқунлари бўйича маълумотномани ҳамда ушбу чораларнинг амал қилишини давом эттириш, бекор қилиш ёки уларни тақдим этиш тартибини такомиллаштириш ҳақидаги таклифларни Ўзбекистон Республикаси Президенти Администрациясига киритиб боради.

6. Манфаатдор вазирлик ва идоралар:

2024 йил 1 июлга қадар солиқ ва божхона имтиёзларини бериш учун асос бўладиган (лицензия, гувоҳнома ва бошқалар) ҳужжатларнинг тўғрилиги ва ҳаққонийлигини тасдиқлаш учун Солиқ ва Божхона қўмиталари билан ўзаро маълумот алмашиш амалиётини йўлга қўйсин;

2025 йил 1 январга қадар тадбиркорлик субъектларига тақдим этилган қўллаб-қувватлаш чораларидан мақсадли ва самарали фойдаланишни тегишли ахборот тизимларида идоралараро ахборот алмашинуви орқали мониторинг қилиш тартибини жорий этсин.

7. 2025 йил 1 январдан бошлаб “subsidiya.mf.uz” платформасида тадбиркорлик субъектларига тақдим этиладиган қўллаб-қувватлаш чораларининг турлари, муддатлари ва тартибини ўз ичига олган **алоҳида реестр** юритилиши йўлга қўйилсин.

Бунда қўллаб-қувватлаш чоралари ҳақидаги маълумотлар манфаатдор вазирлик ва идоралар томонидан “subsidiya.mf.uz” платформасига **мажбурий тартибда** киритилади.

Манфаатдор вазирлик ва идоралар **уч ой муддатда** тегишлича қўллаб-қувватлаш чораларини хатловдан ўтказган ҳолда, “subsidiya.mf.uz” платформасида алоҳида реестрни юритиш учун қўллаб-қувватлаш чоралари рўйхатини ва улар ҳақидаги маълумотларни тақдим этсин.

8. Солиқ қўмитаси, Рақобатни ривожлантириш ва истеъмолчилар ҳуқуқларини ҳимоя қилиш қўмитаси Иқтисодиёт ва молия вазирлиги билан биргаликда **2024 йил 1 декабрга қадар** “Тадбиркорларнинг барқарорлик рейтинги” электрон платформаси ҳамда Рақобатни ривожлантириш ва истеъмолчилар ҳуқуқларини ҳимоя қилиш қўмитасининг ахборот тизими “subsidiya.mf.uz” платформасига **интеграция қилинишини** таъминласин.

9. Иқтисодиёт ва молия вазирлиги:

а) уч ой муддатда қонунчилик ҳужжатларига ушбу қарордан келиб чиқадиган ўзгартириш ва қўшимчалар тўғрисида Вазирлар Маҳкамасига таклифлар киритсин;

б) 2024 йил 1 октябрга қадар:

манфаатдор вазирлик ва идоралар билан биргаликда тадбиркорлик субъектларига субсидиялар, имтиёзлар ва преференциялар тақдим этилишини тизимли мониторинг қилиш ва уларнинг самарадорлигини баҳолаш тартибини (методологиясини) ишлаб чиқсин ва тасдиқлаш учун Вазирлар Маҳкамасига киритсин;

Ҳисоб палатаси билан биргаликда тадбиркорлик субъектлари томонидан мақсадсиз фойдаланилган ҳамда асоссиз олинган субсидияларни қайтариб олиш тартибини ишлаб чиқсин.

10. Мазкур қарорнинг ижросини самарали ташкил қилишга масъул этиб Бош вазир ўринбосари Ж.А. Қўчқоров белгилансин.

Қарор ижросини муҳокама қилиб бориш, масъул ташкилотлар фаолиятини мувофиқлаштириш ва назорат қилиш Ўзбекистон Республикаси Бош вазири А.Н. Арипов зиммасига юклансин.

**Ўзбекистон Республикаси
Президенти**



Ш. Мирзиёев

Тошкент шаҳри

**Тадбиркорлик субъектларига тақдим этиладиган
субсидиялар, имтиёзлар ва преференцияларни мақбуллаштириш
ҳамда уларнинг самарадорлигини таъминлаш бўйича
РЕСПУБЛИКА КОМИССИЯСИ ТАРКИБИ**

1. Ж.А. Қўчқоров – Бош вазир ўринбосари – иқтисодиёт ва молия вазири, *Республика комиссияси раиси*
2. Д.А. Ваҳобов – Савдо-саноат палатаси раиси, *Республика комиссияси раиси ўринбосари*
3. М.Р. Абдуллаев – Ҳисоб палатаси раисининг биринчи ўринбосари, *Республика комиссияси раиси ўринбосари*
4. Д.С. Қосимов – Тадбиркорлик субъектларининг ҳуқуқлари ва қонуний манфаатларини ҳимоя қилиш бўйича вакил
5. А.Д. Ташкулов – адлия вазири
6. Л.Ш. Кудратов – инвестициялар, саноат ва савдо вазири
7. Б.А. Мусаев – камбағалликни қисқартириш ва бандлик вазири
8. К.А. Шарипов – олий таълим, фан ва инновациялар вазири
9. Х.У. Умарова – мактабгача ва мактаб таълими вазири
10. А.А. Худаяров – соғлиқни сақлаш вазири в.б.
11. И.Ю. Абдурахмонов – қишлоқ хўжалиги вазири
12. Ш.Р. Хамраев – сув хўжалиги вазири
13. И.Р. Махкамов – транспорт вазири
14. *Лавозими бўйича* – Рақобатни ривожлантириш ва истеъмолчилар ҳуқуқларини ҳимоя қилиш қўмитаси раиси
15. А.Я. Хайдаров – иқтисодиёт ва молия вазири ўринбосари
16. Ш.Д. Кудбиев – Солиқ қўмитаси раиси

17. А.Ю. Мавлонов – Божхона қўмитаси раиси
18. У.Р. Шадиев – Туризм қўмитаси раиси
19. А.Ж. Ортиқов – Давлат активларини бошқариш агентлиги директори
20. М.М. Убайдуллаев – Маҳаллабай ишлаш ва тадбиркорликни ривожлантириш агентлиги директори
21. Т.А. Саттаров – Ўзбекистон фермер, деҳқон хўжаликлари ва томорқа ер эгалари кенгаши раиси ўринбосари
22. И.Р. Тангриев – Вазирлар Маҳкамасининг котибият мудирини, Республика комиссияси котиби

Изоҳ.

Республика комиссиясининг аъзолари бошқа ишга ўтган тақдирда, унинг таркибига ушбу лавозимларга янгидан тайинланган ёки зиммасига тегишли функцияларни бажариш юкланган шахслар киритилади.

Республика комиссияси ўзига юкланган вазифаларни амалга оширишда зарур ҳолларда, бошқа вазирлик ва идораларнинг раҳбар ва масъул ходимларини жалб этиш ҳуқуқига эга.

**Тадбиркорлик субъектларига субсидиялар, имтиёзлар ва преференциялар
тақдим этиш ҳамда уларнинг самарадорлигини таъминлаш учун
масъул вазирлик ва идораларнинг
РЎЙХАТИ**

Т/р	Субсидия, имтиёз ва преференциялар	Масъул вазирлик ва идоралар
1.	Аҳолининг тадбиркорлик ташаббусларини қўллаб-қувватлаш бўйича субсидиялар	Камбағалликни қисқартириш ва бандлик вазирлиги
2.	Экспорт фаолияти билан шуғулланувчи тадбиркорлик субъектларини қўллаб-қувватлаш билан боғлиқ субсидиялар, имтиёзлар ва преференциялар	Инвестициялар, саноат ва савдо вазирлиги
3.	Қишлоқ хўжалиги соҳасига оид субсидиялар, имтиёзлар ва преференциялар	Қишлоқ хўжалиги вазирлиги
4.	Сув хўжалиги соҳасига оид субсидиялар, имтиёзлар ва преференциялар	Сув хўжалиги вазирлиги
5.	Саноат ва ишлаб чиқариш соҳасига оид субсидиялар, имтиёзлар ва преференциялар	Инвестициялар, саноат ва савдо вазирлиги, Иқтисодиёт ва молия вазирлиги
6.	Энергетика соҳасига оид субсидиялар, имтиёзлар ва преференциялар	Энергетика вазирлиги
7.	Транспорт соҳасига оид субсидиялар, имтиёзлар ва преференциялар	Транспорт вазирлиги
8.	Таълим соҳасини ривожлантириш билан боғлиқ субсидиялар, имтиёзлар ва преференциялар	Олий таълим, фан ва инновациялар вазирлиги, Мактабгача ва мактаб таълими вазирлиги
9.	Соғлиқни сақлаш соҳасини ривожлантириш билан боғлиқ субсидиялар, имтиёзлар ва преференциялар	Соғлиқни сақлаш вазирлиги
10.	Туризм соҳасини ривожлантириш билан боғлиқ субсидиялар, имтиёзлар ва преференциялар	Туризм қўмитаси

11.	Солиқ соҳасига оид имтиёзлар ва преференциялар	Солиқ қўмитаси
12.	Божхона соҳасига оид имтиёзлар ва преференциялар	Божхона қўмитаси
13.	Давлат кўчмас мулки объектлари билан боғлиқ имтиёзлар ва преференциялар	Давлат активларини бошқариш агентлиги
14.	Ер ва ер ажратиш билан боғлиқ имтиёзлар ва преференциялар	Кадастр агентлиги
15.	Тадбиркорлик субъектлари учун банк кредитлари бўйича имтиёзлар	Маҳаллабай ишлаш ва тадбиркорликни ривожлантириш агентлиги, Марказий банк, тижорат банклари

Изоҳ. Мазкур рўйхатга Тадбиркорлик субъектларига тақдим этиладиган субсидиялар, имтиёзлар ва преференцияларни мақбуллаштириш ҳамда уларнинг самарадорлигини таъминлаш бўйича республика комиссияси томонидан тегишли ўзгартириш ва қўшимчалар киритилиши мумкин.

